

20.11.2020

UKA2020/7-2

2021-mut Aningaasanut Inatsisissatut siunnersuut
(Aningaasaqarnermut Naalakkersuisoq)

Siumup tungaaniit Aningaasaqarnermut Ataatsimiititaliaq qutsavigerusupparput Ataatsimiititaliatut nuannersumik suleqatigiinnissarlu anersaaralugu sulimmat. Taamaaliornikkut isummat nutaat allaanerusinnaasullu mattussuunnagit suliarisarsimavagut. Siumumiillu oqaatigissavarput sulinermit suleriaaseq tamanna peqqinnartutut anersaarlu suleqatigiikkusunermik imalik atorneqarsimalluni.

Naalakkersuisut Inatsimmut allannguutissanik 54-inik saqqummiussaqaqput oqaaseqaatinullu aamma allannguutissanut arfineq pingasunik. Siumumiit nuannaarutigaaqput suliassat taakku paaseqatigiilluarluta suliarisimagatsigit. Taakkulu erninnaq taaseqattaarnitsigit naatsorsuutigaa akuerineqassasut.

Siumumiit maluginiarparput 2021 –imut Aningaasanut Inatsisissatut siunnersuut pisarnermit allaanerusumik Aningaasaqarnermut ataatsimiititaliami suliarineqarsimavoq. Suleriaatsimi tassani pingaarnerulluni Naalakkersuisut sipaarutissanik namminneerlutik Aningaasaqarnermut ataatsimiititaliamut innersuussissallutik.

Uggornartumilli tamanna iluatsippallaarsimangilaq. Taamaakkaluatorli Siumumiit innersuussutigissavarput suleriaaseq taanna 2022-imut Aningaasanut Inatsisissap suliarineqarnerani atoqqullugu.

Ataatsimiititaliamit maluniarneqarpoq Aningaasaqarnermut Siunnersuisooqatigiit naatsorsuutigigaat Coronamut atatillugu nunatta aningaasarsiornikkut eqqugaanissaa siusinnerusukkut nalunaarutigineqartunit ajunnginnerusoq.

Tamannalu nuannaarutigaaqput aammalu isumaqarpugut Coronamut atatillugu Naalakkersuisut sulinerat ataatsimut isigalugu ajunngilluinnartuusoq. Taamaakkaluatorli 2021-mi Corona qanoq sunniuteqassanersoq suli tamakkiisumik ilisimangilarput.

Ilisimasallit nalunaarutigisarpaat naatsorsuutigineqartoq ungasinngitsukkut Corona-mut akiuussutissamik atorsinnaasumik saqummertoqassasoq. Tamannalu iluatsippat neriuutigaaqput takornariaqarnikkut nunanit allaneersut amerliartornissaat anguneqarumaartoq.

Naalakkersuisut saqqummiussaani Eqqumiitsuliornermut aningaasaateqarfimmik pilersitsinissaq taaneqarpoq. Siumup tungaaniit nuannaarutigaaqput eqqumiitsulioortortagut taamaattumik periarfissaqalissammata.

Coronap anigoriartuaarnerisa aamma kingunerissavaat aatsitassanik ujaasinerit aammalu ammaanerit annertuseriassasut. Taamaattumik Naalakkersuisut Siumumiit tapersorsorpagut Suliniutit taakku sukkanerusumik piviusunngortinneqarnissaannut iliuuserisaannut. Sulinermut ilanngasat 2019-imi aalajangerneqartoq aningaasatigullu 79,4 mio. kr.-inik sunnuteqartussap atuutilerneratigut innuttaasunut august 2021-imi malunniuteqarnissaa pissangalluta malinnaaffigissavarput.

Siumumiit nuannaarutigaarput partiit akornanni maannamut assortuussutaanngitsutut isikkoqartumik Aasianni innarluutillit ilinniarfiat , Ado Lyngø – nutaamik innarluutilinnullu Tulluarsakkamik sananeqarnissaanut isikkoqalersutut malunnarsimmat.

Aammattaaq aasaq tassunga pulaarnitsinni maluginiarparput aningaasaqarnikkut tassani atuartsuusut pineqarnerat innarluutilinnut allanut sanilliullugu pitsaannginnerusoq. Siumumiit isumaqarpugut taakku iluarsinissaannut suliniutit sukkasuumik ingerlanneqassasut.

Siumut suli isumaqarpoq nunatta immikkoortortaani tamani ineriartornissamut periarfissat naligiimmik periarfissaqalernissaat anguneqassasoq. Tassani pineqarput mittarfiit aqquuserngillu. Siumumiit naatsorsuutigilluinnarparput isumaqatigiinniarnert naammasseriarpata Aningaasanut inatsisissap pingajussaaneernissaani ilanngunneqassasut. Taakkulu saniatigut ilanngunneqassapput sumiif-fiit ilaanni inuussutissarsiornikkut periarfissat amerlisarnissaat.

Angallannermi kiffartuussinnermi isumaqatigiissut ukiup tulliani atuutilertussap innuttaasunut Ullumikkorniit pitsaanersumik kinguneqarnissaa qularinngilarput. Siumullu suleqataarusuppoq Pingajussaarininnissami saqqimmiunneqartuassanut suleqataassalluni

Innuttaaqateqarpugut piniarnermik inuussuteqartunik. Taamaattumik Siumumiit oqaatigeriissavarput amminik tunitsiveqarnikkut atugassarititat annertuumik pitsanngorsarneqarnissaat Naalakkersuisunut piumasarissagatsigu. Tusagassiutitigut tusarparput minkit tuniniarneqartarnerat annertumik eqqugaassa-soq. Siumumiit naatsorsuutigilluinnarparput Naalakkersuisut, piniartut tunitsiviillu suleqatigiilluinnarlutik Piniartortatsinnut iluaqutissanngorlugu naammassissagaat.

Siumumiit suleqataarusuppugut utoqqalinersiaqarnissamut killigittat pilersaarutaassut malillugit 1.januar 2021 atuutilertinneqarnissaat atorunnaasittariaqartoq. Siumut isumaqarpoq ullumikkut killigittinneqartoq, tassalu 66 –inik ukioqarneq atuutiinnassasoq.

Inatsisissamut siunnersuummut atatillugu Siumumiit isumaqarpugut akitsuutit allallu inuiaqatigiinnut malunnaatilimmik artukkiisiinnaasunut pinngitsoortinnissaat anguniaratsigu. Naatsorsuutigineqasaarlu tassunga tunngasut malinnaaffigineqarumaartut.

Aningaasanut Inatsisissap siullermiinnerani Siumumiit oqariartuutitta ilagaat inuiaqatigiit kalaallit toqqissimanartumik ingerlanneqarnissaannut pisariaqassappat aningaasanik attartorsinnaaneq periarfissat ilagissagaat. Tamannalu sanaartugassanut assigiinngitsunut atatillugu periarfissatut atornerarsinnaassasoq isumaqarpugut.